



Nezavisna komisija za praćenje uslova boravka u zavodima, postupanje i poštivanje ljudskih prava lica nad kojima se izvršavaju krivične sankcije i druge mjere koje je izrekao u krivičnom postupku Sud Bosne i Hercegovine, strani sudovi za djela predviđena Krivičnim zakonom Bosne i Hercegovine ili međunarodnim ugovorom čija je potpisnica Bosna i Hercegovina ili drugi sud sa zakonom Bosne i Hercegovine

Број/Број : 06/7-50-13-107-8-3/11

Сарајево/Sarajevo, 28.4.2011.

ZAPISNIK

8. sjednice Nezavisne komisije za praćenje uslova boravka u zavodima, postupanje i poštivanje ljudskih prava lica nad kojima se izvršavaju krivične sankcije i druge mjere koje je izrekao u krivičnom postupku Sud Bosne i Hercegovine, strani sudovi za djela predviđena Krivičnim zakonom Bosne i Hercegovine ili međunarodnim ugovorom čija je potpisnica Bosna i Hercegovina, ili drugi sud u skladu sa zakonom Bosne i Hercegovine (u daljnjem tekstu: Nezavisna komisija), održane 28.4.2011., s početkom u 10 sati

PRISUTNI ČLANOVI NEZAVISNE KOMISIJE: Mile Lasić, Semiha Borovac, Damir Čačković, Milana Škipina i Predrag Crnogorac.

OSTALI PRISUTNI: predstavnici Institucija ombudsmena za ljudska prava BiH Ljubomir Sandić i Nives Jukić.

Sjednicu je otvorio i njome predsjedavao predsjednik Nezavisne komisije Mile Lasić.

Za sjednicu je predložen sljedeći

DNEVNI RED

1. Usvajanje Zapisnika 7. sjednice Nezavisne komisije;
2. Saradnja - sastanak s predstavnicima Institucije ombudsmena za ljudska prava BiH;
3. Razmatranje prijedloga za izgled i sadržaj promotivnog letka Nezavisne komisije;
4. Tekuća pitanja.

Dnevni red usvojen je jednoglasno bez dodatnih prijedloga i sugestija, nakon čega se prešlo na raspravu o pojedinačnim tačkama.

Ad.1. Usvajanje Zapisnika 7. sjednice Nezavisne komisije

Zapisnik 7. sjednice Nezavisne komisije usvojen je jednoglasno s tim da se izvrši dopuna u tački 2., četvrti red, gdje iza teksta: „sastanak s ministrom pravde BiH“ treba dodati i riječi: „i zamjenikom ministra pravde BiH“.

U okviru ove tačke dnevnog reda predsjednik Nezavisne komisije upoznao je članove da je Kolegij Sekretarijata Parlamentarne skupštine BiH dostavio Odgovor na zahtjev za sredstva budžeta, broj: 03/a 26-1-308-1/11, od 18.4.2011. U navedenom odgovoru Kolegij

Sekretarijata iznio je mišljenje da se Nezavisna komisija treba obratiti komisijama za finansije i budžet oba doma Parlamentarne skupštine BiH kako bi se pripremio amandman na Prijedlog zakona o Budžetu institucija Bosne i Hercegovine i međunarodnih obaveza Bosne i Hercegovine za 2011. i na taj način osigurala potrebna sredstva za rad Nezavisne komisije.

Nakon kraće diskusije, Nezavisna komisija jednoglasno je donijela

ZAKLJUČAK

Komisiji za finansije i budžet Predstavničkog doma i Komisiji za finansije i budžet Doma naroda uputiti dopis kojim će se tražiti da navedene komisije odmah po prijemu Prijedloga zakona o Budžetu institucija Bosne i Hercegovine i međunarodnih obaveza Bosne i Hercegovine za 2011. godinu preduzmu potrebne aktivnosti na pripremi amandmana kako bi sredstva koja je ranije odobrila Zajednička komisija za administrativne poslove u iznosu od 145.000,00 KM potrebna za rad Nezavisne komisije u 2011.godina bila predviđena i u Zakonu o Budžetu institucija Bosne i Hercegovine i međunarodnih obaveza Bosne i Hercegovine za 2011. godinu.

Ad.2. Saradnja - sastanak s predstavnicima Institucije ombudsmena za ljudska prava BiH

U vezi s ovom tačkom dnevnog reda, predsjednik Nezavisne komisije obavijestio je prisutne da je povod zajedničkog sastanka s predstavnicima Institucije ombudsmena za ljudska prava BiH to što Nezavisna komisija saraduje sa svim institucijama koje rade u oblasti praćenja poštivanja ljudskih prava u zatvorima.

Zatim je predsjednik Nezavisne komisije dao riječ predstavnicima Institucije ombudsmena za ljudska prava BiH.

Ombudsmen za ljudska prava Nives Jukić zahvalila je na pozivu za zajednički sastanak i istakla da je treći ombudsmen Jasminka Džumhur zbog bolesti spriječena prisustvovati današnjem sastanku.

Ombudsmen za ljudska prava Ljubomir Sandić izrazio je zadovoljstvo što Nezavisna komisija početak rada bazira na saradnji s ombudsmenima. U svom izlaganju ombudsmen Ljubomir Sandić istako je da Institucija ombudsmena za ljudska prava BiH ima sedam odjela i da postoji poseban Odjel za praćenje prava pritvorenika čiji je šef Rada Kafedžić a koja je također zbog bolesti spriječena prisustvovati današnjem sastanku. Institucija ombudsmena za ljudska prava BiH bavi se zaštitom ljudskih prava u zatvorima na teritoriji cijele BiH. U toku 2010. i 2011.godine Institucija ombudsmena za ljudska prava BiH imala je pojednične i grupne žalbe zatvorenika koji su se uglavnom žalili na uslove u zatvoru i prava koja im pripadaju prilikom služenja kazne. Po osnovu primljenih žalbi i u saradnji s drugim institucijama BiH preduzimane su potrebne mjere u formi preporuka. U velikom broju slučajeva preporuke su prihvaćene osim tamo gdje to nije bilo moguće kao što je slučaj npr. žalbe zatvorenika koji je 100%-tni invalid da se uslovi u zatvoru prilagode njegovoj invalidnosti. Mišljenje ombudsmena je da objektivno nema nekog značajnijeg i grubog kršenja ljudskih prava u zatvorima. Jedan od stalnih problema je diskriminacija među zatvorenicima zavisno od suda koji ih je osudio i po kojem zakonu kao i prekobrojnost zatvorenika u odnosu na smještajne kapacitete većine zatvora. Veliki broj problema koji se odnose na poštivanje ljudskih prava lica lišenih slobode kao i niz pozitivnih primjera s kojima se Institucija ombudsmena BiH susrela u svom radu iznesen je u Specijalnom izvještaju o

stanju ljudskih prava u ustanovama za izvršenje krivičnih sankcija u BiH kao i Godišnjem izvještaju o rezultatima aktivnosti ombudsmena za ljudska prava BiH za 2010.godinu.

Zatim se predsjednik Nezavisne komisije zahvalio na obraćanju ombudsmena i istakao da se u narednom periodu planira sastanak s upravicima zatvora u BiH te da će Nezavisna komisija za ovaj sastanak uputiti i poziv ombudsmenima.

Predsjednik Nezavisne komisije obavijestio je ombudsmene da je Nezavisna komisija donijela Poslovnik o radu koji je objavljen u „Službenom glasniku BiH“, broj 23/11, od 29.03.2011., da je u toku izrada promotivnog letka Nezavisne komisije te da će Nezavisna komisija pristupiti operativnom radu na terenu, u skladu sa svojim nadležnostima, kada bude donesen Zakon o budžetu institucija Bosne i Hercegovine i međunarodnih obaveza Bosne i Hercegovine za 2011.godinu.

Zatim je predsjednik Nezavisne komisije dao riječ članovima Nezavisne komisije.

Za riječ se javila član Nezavisne komisije Semiha Borovac koja je istakla da se treba voditi računa da se ne dođe u situaciju u kojoj bi Nezavisna komisija i Institucija ombudsmena za ljudska prava BiH imali različite konstatacije i različite izvještaje o istim pitanjima ili da se određeni poslovi ne dupliraju. Zbog toga je potrebna stalna saradnja i koordinacija između Nezavisne komisije i Institucije ombudsmena za ljudska prava BiH.

Nakon što je zaključena raspava o ovoj tački dnevnog reda, Nezavisna komisija jednoglasno je usvojila sljedeći

ZAKLJUČAK

I. Nezavisna komisija u obavljanju poslova iz svoje nadležnosti održavat će sastanke s predstavnicima Institucije ombudsmena za ljudska prava BiH a u slučaju potrebe i zajedničke sastanke s predstavnicima Institucije ombudsmena za ljudska prava BiH te predstavnicima drugih institucija u BiH kao i nevladinog sektora u BiH.

II. Nezavisna komisija i Institucija ombudsmena za ljudska prava BiH vršit će redovnu razmjenu informacija i dokumenata koji se odnose na tretman lica lišenih slobode.

III. Za zajednički sastanak Nezavisne komisije i upravnika svih zatvora u BiH Nezavisna komisija uputit će poziv i Instituciji ombudsmena za ljudska prava BiH.

IV. U slučaju da se ukaže potreba a u skladu s odredbama Zakona BiH o izvršenju krivičnih sankcija, pritvora i drugih mjera, Nezavisna komisija koristit će i mogućnost zajedničkog djelovanja i organiziranja zajedničkih posjeta zatvorima u BiH s Institucijom ombudsmena za ljudska prava BiH.

Predstavnici Institucije ombudsmena za ljudska prava BiH zahvalili su se na pozivu članovima Nezavisne komisije i izrazili spremnost za buduću saradnju, nakon čega su napustili sjednicu Nezavisne komisije.

Ad.3. Razmatranje prijedloga za izgled i sadržaj promotivnog letka Nezavisne komisije

U vezi s ovom tačkom dnevnog reda, predsjednik Nezavisne komisije prezentirao je prijedlog izgleda i sadržaja promotivnog letka Nezavisne komisije koji je članovima Nezavisne komisije dostavljen u materijalima za ovu sjednicu.

Nakon kraće rasprave, Nezavisna komisija jednoglasno je usvojila prezentirani izgled i sadržaj promotivnog letka Nezavisne komisije.

Ad.4. Tekuća pitanja

U okviru ove tačke dnevnog reda, predsjednik Nezavisne komisije konstatirao je da se za sljedeću sjednicu treba pripremiti Plan aktivnosti Nezavisne komisije u narednom periodu da Nezavisna komisija treba da djeluje u slučaju kršenja ljudskih prava zatvorenika za koja sazna putem medija te da svi članovi Nezavisne komisije treba da se upoznaju sa Specijalnim izvještajem o stanju ljudskih prava u ustanovama za izvršenje krivičnih sankcija u BiH kao i Godišnjem izvještaju o rezultatima aktivnosti ombudsmena za ljudska prava BiH za 2010. godinu koji su dostupni na veb-stranici Institucije ombudsmena za ljudska prava BiH a koji mogu biti značajni za organiziranje posjete Nezavisne komisije nakon od zatvora u BiH.

Predsjednik Nezavisne komisije istakao je i da je potrebno obratiti se Zajedničkoj komisiji za administrativne poslove radi donošenja odluke o naknadi troškova od mjesta boravka, koje imaju članovi Nezavisne komisije kada djeluju van sjednice komisije tj. kada se organizira sastanak s predstavnicima drugih institucija BiH ili međunarodnih organizacija.

U okviru ove tačke dnevnog reda, član Nezavisne komisije Milana Škipina upoznala je prisutne da je u aprilu ove godine u posjeti BiH boravio Evropski komitet za prevenciju torture i neljudskog i ponižavajućeg postupanja ili kažnjavanja (CPT). Posjetu je, prema neslužbenim informacijama, organiziralo Ministarstvo za ljudska prava i izbjeglice BiH.

U vezi s informacijom o posjeti CPT-a Bosni i Hercegovini, među članovima Nezavisne komisije vođena je kratka diskusija u kojoj je preovladao stav da navedena posjeta nije organizirana kako treba i da je domaćin trebalo da bude upravo Nezavisna komisija. Nedopustivo je da u izvještaju CPT-a o posjeti BiH koji će biti dostavljen u narednom periodu ne bude ni spomenuto postojanje i rad Nezavisne komisije.

U vezi s navedenim, Nezavisna komisija jednoglasno je donijela

ZAKLJUČAK

I. Ministarstvu za ljudska prava i izbjeglice BiH uputiti dopis kojim će se tražiti informacije o posjeti CPT-a BiH u aprilu ove godine kao i dostavljanje preliminarnog izvještaja CPT-a o posjeti BiH.

II. Evropskom komitetu za prevenciju torture i neljudskog i ponižavajućeg postupanja ili kažnjavanja (CPT) direktno uputiti dopis kojim će se upoznati s formiranjem i radom Nezavisne komisije, tražiti da se u budućim aktivnostima CPT-a vezanim za Bosnu i Hercegovinu po pitanju tretmana lica lišenih slobode aktivno uključi Nezavisna komisija te zatražiti dostavljanje preliminarnog izvještaja o nedavnoj posjeti BiH.

U okviru ove tačke dnevnog reda predsjednik Nezavisne komisije konstatirao je da, s ciljem uspješne realizacije planiranih posjeta KP zavodima u BiH kao i pravovremenog i ispravnog postupanja u slučaju prijema pismene predstave osuđenog lica, neophodno da Nezavisna komisija ima podatke o svim osuđenim licima koja se nalaze na izdržavanju kazne zatvora a koja spadaju u naležnost ove komisije.

U vezi s navedenim, Nezavisna komisija jednoglasno je donijela

ZAKLJUČAK

Ministarstvu pravde BiH uputiti dopis kojim će se tražiti dostavljanje spiska lica nad kojima se u BiH izvršava kazna zatvora koju je izrekao u krivičnom postupku Sud BiH, strani sudovi za djela predviđena Krivičnim zakonom BiH ili međunarodnim ugovorom čija je potpisnica Bosna i Hercegovina, ili drugi sud u skladu sa zakonom Bosne i Hercegovine.

Navedeni spisak lica treba da sadrži:

- ime i prezime,
- datum i mjesto rođenja,
- nacionalnost,
- državljanstvo,
- zatvorenički broj,
- sud koji je izrekao kaznu zatvora i vrijeme na koje je izrečena i za koje krivično djelo,
- da li je vrijeme u pritvoru uračunato u kaznu zatvora,
- od kada se nalazi na izdržavanju kazne i u kojem zavodu, kao i razlog premještaja,
- kada je redovan istek kazne zatvora,
- da li je disciplinski kažnjavao,
- koje pogodnosti koristi i dr.

Predsjednik Nezavisne komisije istakao je da je, s ciljem pripreme Nezavisne komisije za operativni rad na terenu tj. realizacije posjete nekom od zatvora u BiH, neophodno do naredne sjednice utvrditi izgled i sadržaj radnog naloga, te je u vezi s tim Nezavisna komisija jednoglasno donijela

ZAKLJUČAK

Za pripremu prijedloga sadržaja i izgleda radnog naloga Nezavisne komisije zadužuju se drugi zamjenik Nezavisne komisije Predrag Crnogorac i član Nezavisne komisije Milana Škipina. Rok za izradu prijedloga radnog naloga je sljedeća sjednica Nezavisne komisije.

Predsjednik Nezavisne komisije konstatirao je da je u narednom periodu potrebno preduzeti intenzivne aktivnosti na pripremi sastanka s upravnicima zatvora u BiH, na izradi promotivnog letka i službene legitimacije za Nezavisnu komisiju.

Predsjednik Nezavisne komisije Mile Lasić zaključio je sjednicu u 15 sati.

PRIVREMENI SEKRETAR

NEZAVISNE KOMISIJE

Eldina Smailagić

PREDSJEDNIK

NEZAVISNE KOMISIJE

dr. sc. Mile Lasić